

ՔՐԵԱԿԱՆ ԻՐԱՎՈՒՆՔԻ ՀԱՐՑԵՐԸ «ՈՐՈԳԱՅԹ ՓԱՌԱՅՈՒՄ»

Հ. Ս. ԽԱՉԱՏՐՅԱՆ

Քրեական իրավունքի տեսության մեջ իր առաջատար տեղն ունի հանցագործության հասկացության հարցը, որը հայտնի չափով պատկերացում է տալիս այս կամ այն մտածողի քրեաիրավական հայացքների բնույթի մասին: Ինչպես ժամանակի շատ մտածողներ, այնպես էլ Շահամիր Շահամիրյանը¹ այդ հարցը, քրեական իրավունքի այլ հարցերի հետ, բացատրել և հիմնավորել է նախ՝ բնաիրավական տեսությունների (բնական իրավունքի, աստվածային իրավունքի և հասարակական դաշինքի) դրույթներով, հետո միայն՝ դրական իրավունքով:

Շահամիրյանի աստվածային իրավունքի տեսության համաձայն ու մեկը իրավունք չունի հասարակության մեջ թագավոր լինել և իր կամքը թելադրել ժողովրդին, իսկ վերջինս էլ իր հերթին պարտավոր է արգելակել միապետական կարգերի ստեղծումը, խոչընդոտել դրանց պահպանմանը²: Երբ խախտվում է հիշյալ պահանջը, ապա դրանում մեղավոր են ոչ միայն միապետները, այլև հենց ինքը ժողովուրդը, որի թողտվությամբ իրականացվում է նման կարգերի ստեղծումը³: Այսպիսով, աստվածային իրավունքի տեսանկյունից հանցագործություն է համարվում ամեն մի արարք (գործողություն կամ անգործություն), որը նպաստում է կառավարման միապետական կարգերի ստեղծմանը և կամ դրա պահպանմանը:

Դրական իրավունքի տեսանկյունից հանցագործության հարցը Շահամիրյանը քննության է տուել ապագայում ստեղծվելիք հայկական հանրապետության պայմաններում: Ի տարբերություն ավատական կարգերի, որտեղ միևնույն արարքը հանցագործություն համարելու կամ չհամարելու հարցը կախված էր տիրող դասակարգի կամքը կատարող առանձին անհատների հայացողությունից, հանրապետական կարգերում այն բացառապես որոշվելու էր օրենքով. «Ուրեմն մի ոք իցէ զի ըստ կամաց և ըստ հաճոյից իւրոյ իշխեսցի ի վերայ մեր, եթէ ո՛չ ըստ Օրինօք գործոյ ձեռաց մերոց հատուցէ մեզ ըստ արժանութն դործոյ մերոյ, զի ամենապէս ոք... արժանի գտցի պատուոյ և պատժոյ ըստ արժանաւորութեան գործոյն իւրոյ»⁴, «բառցցի և կորնչեսցի ամենայն չարագործ ըստ արժանի գործոյն ձեռաց իւրոց ըստ Օրինօք՝ առ ի պատիւ հասարակ ազգի»⁵: Այս և համանման այլ դատողություններով Շահամիրյանն ավելի մատչելի ձևով է արտահայտել «չկա հանցագործություն, չկա պատիժ առանց օրենքի» սկզբունքի պահանջը: Շահամիրյանը գտնում էր, որ հանցագործության հարցի լուծման համար անհրաժեշտ է ոչ միայն համապատասխան օրենքի գոյության փաստը, այլև այդ օրենքը պետք է սահմանված լինի այն հաշվով, որպեսզի հասարակությունը, ժամանակի առումով, հնարավորու-

1 Շահամիրյանի արժարժած քրեաիրավական հարցերին իրենց ժամանակին անդրադարձել են Լեոն (Երկերի ժողովածու. հ. II, գիրք երկրորդ, Երևան, 1973, էջ 545), Ա. Հովհաննիսյանը (Россия и армянское освободительное движение в 80-х годах XVIII столетия. Ереван, 1947, с. 145), Գ. Գրիգորյանը (Հայ առաքելոր հասարակական-քաղաքական մտքի պատմությունից. Երևան, 1957, էջ 113—115) և այլք:

2 Շ. Շահամիրյան. Որոգայթ փառաց. Թիֆլիս, 1913, էջ 42—43:

3 Նույն տեղում, էջ 26—28: Ժողովրդի վրա «մեղք» բարդելու փաստը պայմանավորված էր հայերին ավատատիրական կարգերի դեմ հանելու անհրաժեշտությամբ:

4 Նույն տեղում, էջ 19—20:

5 Նույն տեղում, էջ 40:

թյուն ունենա իմանալ, թե որ վարվելակերպն է օրենքով արգելված և այն զրպետելուց ինչպիսի պատիժ է սպասվում. «Նովա (օրենքով—Հ. Խ.) պարտադր առնէ մեղ հեռանալ ՚ի գործոց շարութենէ որում ծանեաք պատիժս և նախատինս ըստ Օրինօք մերովք»⁶, «յօրէնս և կարգս, և կանօնս ձեր զի ծանուցէ ձեզ զոր ինչ գործ բարի և չար և զոր ինչ հարկաւոր գործելոյ և հրաժարելոյ»⁷։ Այլ կերպ ասած, Շահամիրյանը պահանջում է, որ պատասխանատվություն («նախատինք») սահմանող օրենքներին ընդհանրապես և քրեական պատիժ նախատեսող կամ պատժաւաժիւր խստացնող օրենքներին՝ մասնաւորապես, ետադարձ ուժ չտրվի։

Ինչպես ասվեց, դրական իրավունքի տեսանկյունից հանցագործությունն է համարվում օրենքով արգելված ամեն մի արարք։ Սույն բնորոշումը վերաբերում է հանցագործության հասկացության բացահայտման ձևական կողմին։ Այսինքն էր հասկանում Շահամիրյանը նյութական առումով հանցագործություն ասելով։ «Որոգայթ փառացր», իր իսկ հեղինակի վկայակոչմամբ, հանդիսանում էր օրենքների մի այնպիսի ժողովածու, որը ելնում էր բացառապես ժողովրդի բարօրությունից⁸, և այդ բարօրության դեմ ուղղված ամեն մի ոտընձգություն դիտվում էր հանցագործություն։ Չնայած Շահամիրյանը, որպես լուսավորական մտածող, բարօրությունը հասկանում էր ժողովրդի շահերի պիտանքից, սակայն իրականում այն ունեւր դասակարգային բովանդակություն և ըմբռնվում էր քաղաքական իշխանության ձգտող հայ առևտրական բուրժուազիայի աշխարհայացքով։ Բուրժուական գաղափարախոսները չէին պատկերադրում և չէին էլ կարող պատկերացնել մարդու բարօրությունը առանց արտադրամիջոցների մասնավոր սեփականության և տնտեսական գործունեության աղանդականության։ Բավական է նշել, որ «Որոգայթում» սեփականության մասնավոր ձևը և տնտեսական գործունեության աղանդական անձեռնմխելիությունը երաշխավորվում էր այն պատժատեսակներով և պատժաւաժիւրով, որոնք նախատեսված էին մարդու կյանքի և առողջության դեմ ուղղված հանցագործությունների համար⁹։ Դրա հետ միասին, պետք է նկատել, որ բուրժուազիան իր քաղաքական պայքարում հաջողության հասնելու համար չէր կարող բարօրության հասկացության մեջ չմտնել այնպիսի պահանջներ (անձի կյանքի, գույքի, պատվի, արժանապատվության ապահովումը և այլն)¹⁰, որոնք օբյեկտիվորեն շարտահայտեին նաև ստորին խավերի շահերը։ Հենց այս փաստի ուժով է, որ պատմական ասպարեզ իջած բուրժուազիայի գաղափարախոսների պահանջները ընդհանրապես և լուսավորականներին՝ մասնաւորապես, ձեռք բերեցին առաջադիմական բնույթ։ Այս տեսակետից «Որոգայթում» քրեական իրավունքի միջոցով պաշտպանվում էր նաև անձի կյանքը (հոգված 463), առողջությունը, պատիվն ու արժանապատվությունը (հոգվածներ 129, 466), ինքնաշին իրավունքները (հոգվածներ 466, 467), ազատությունները՝ այդ թվում և օտարազգիների խղճի ազատությունը (հոգվածներ 128, 129, 485) և այլն։ Սակայն Շահամիրյանը չէր տեսնում և չէր էլ կարող տեսնել, որ իր երազած հասարակարգը, որի դեմ գործած արարքների համար նախատեսում էր ծանրագույն պատիժներ (հոգվածներ 484, 486 և այլն), իրականում ներհակ դասակարգին երբեք չէր կարող տալ ամենացանկալի բարօրությունը՝ փաստացի ազատությունը. այն միայն փոխարինելու էր նրանց շահագործման մի ձևը մյուսով, ավելի կատարյալով։

«Որոգայթ փառացում» բավականին ծավալուն խոսվել է նաև հանցագործություններ ծնող պատճառների և դրանց վերացման ուղիների մասին։ Մենք

6 Նույն տեղում, էջ 62։

7 Նույն տեղում, էջ 105։

8 Նույն տեղում, էջ 33—34, 97։

9 Տե՛ս, օրինակ, «Որոգայթ փառաց», հոգվածներ՝ 466, 467, 471, 472, 474 և այլն։

10 Այդ պահանջները, հասկանալի է, չէին արտահայտում աշխատավոր զանգվածների արձատրական շահերը։

պատճառներից հիշարժան են միապետական կարգերի գոյությունը, սոցիալական անբավարար պայմանները և օրինականության բացակայությունը: Վերջին հարցը, մեր կարծիքով, առավել հետաքրքրություն է ներկայացնում, ուստի անհրաժեշտ է կանգ առնել դրա վերլուծության վրա: Ստեղծվելիք հանրապետական կարգերում օրենքների մասին Շահամիրյանի արած դատողություններից երևում է, որ եթե չկա օրենք, ապա չի կարող խոսք լինել օրինականության մասին¹¹: Նա օրինականության նկատմամբ ներկայացրել է որոշակի և հստակ պահանջներ, որոնցից առաջինը օրենքի պահանջի անխախտելիությունն է. «Եթե 'ի մէջ աշխարհին մի՛ գտցի Օրէն անխախտելի և եթէ գուցէ գի հս զերծից 'ի հատուցմանէ պարտուց մեղաց իմոց ատամնայարույթենի և միմիայն միով անձամբ (անգամբ—Հ. Խ.) զերծանելոյ իմոյ 'ի յօրինացն համանգամայն մտցէ անօրենութիւն 'ի մէջ, զի վաղիւն դու փորես աչք եղբօր րոյ, միւսն յափշտակէ զինչ դրացւոյն, միւսն բռնադատէ կուսի պատուոյ և ալլն»¹²: Շահամիրյանը, խոսելով անցյալ ժամանակներում Հայաստանում տիրող անօրինականություններից առաջացած բազմաթիվ վնասների մասին, մասնավորապես նշում է. «Այնքանելի անիրաւութիւնք անցանելով 'ի մէջ, մինչև շաղախեցաւ երկիր 'ի արենէ արդարոց անպարտից»¹³, այսինքն, միայն անօրինականության պայմաններում կարող է անմեղ մարդը ենթարկվել պատժի: Օրինականության հաջորդ պահանջը օրենքի առաջ բոլորի հավասարության սկզբունքն է՝ անկախ նրանց հասարակական դիրքից, սոցիալական ծագումից, կրոնական պատկանելությունից և ալլն. «Ո՛չ մեզ (նկատի ունի հայերին—Հ. Խ.) և ո՛չ 'ի վերայ աշխարհին մերոյ մի՛ լիցի և մի՛ երևեսցի ո՛չ ոք, ով ոք ո՛ր իցէ այր ինքնակալ և ինքնակամ 'ի արարս իւր որ ո՛չ պատժեսցի ըստ Օրինօք»¹⁴: Օրենքի առաջ բոլորի հավասարության սկզբունքը Շահամիրյանի մոտ միաժամանակ ենթադրում է նաև ազգերի հավասարության սկզբունքը: Այս առումով, նա տարբերություն չի դրել, թե հանցագործություն կատարող անձը քրիստոնյա է, թե մահմեդական, հայ է, թե ալլազգի:

Եթե կա հանցագործություն, պետք է լինի նաև պատիժ: Շահամիրյանը գտնում էր, որ աստվածային իրավունքի խախտման համար ժողովուրդն իր պատիժը պետք է կրի հանդերձյալ կյանքում, եթե մինչ այդ չտուղի իր սխալները¹⁵: Ընդհանրապես «Որոգայթում» կրոնական բնույթի (այդ թվում և աստվածային իրավունքի) պահանջների խախտումը, զուտ քրեաիրավական իմաստով, հանցագործություններ չեն համարվում և չեն պատժվում: Միայն մի դեպքում է արտաքնապես Շահամիրյանը այս կարգից նահանջ կատարել, երբ հայոց եկեղեցու դավանանքին պատկանող հայը հավատափոխ է լինում (հոգված 6): Եթե դավանանքը մեր ժամանակներում զուտ խղճի հարց է, ապա քննարկվող ժամանակաշրջանում հայ ժողովրդի համար այն դուրս էր դալիս դավանանքի շրջանակներից և ձեռք էր բերում քաղաքական-աղապահայտնական նշանակություն, որի հետևանքով հավատափոխությունը համարվեք էր դառնում ներկայիս դավաճանությունը:

Շահամիրյանը, ինչպես և իտալական խոշորագույն քրեագետ Բեկկաբիան¹⁶, պատժի կիրառման անհրաժեշտությունը տեսականորեն հիմնավորել է պետության և իրավունքի ստեղծման պայմանագրային տեսության դրույթներով: Շահամիրյանի տեսակետի համաձայն, ժողովուրդը հաստատական

11 Երբ Շահամիրյանը խոսում է ավատական կարգերում գոյություն ունեցող անօրինականությունների մասին, նա նկատի ունի այդ կարգերում աստվածային և բնական իրավունքների ոտնահարման փաստերը:

12 «Որոգայթ փառաց», էջ 72—73:

13 Նույն տեղում, էջ 35:

14 Նույն տեղում, էջ 89:

15 Շահամիրյանի համոզմամբ՝ միապետական կարգերում ապրելու փաստը ինքնին արդեն ժողովրդի համար պատիժ է:

16 Беккариа. О преступлениях и наказаниях. М., 1939, с. 204—206.

դաշինքով պետություն հանրապետական ձևի առաջ պարտավորություն է վերցնում անշեղորեն ենթարկվել իր իսկ ստեղծած օրենքների պահանջներին և միաժամանակ համաձայնություն է տալիս այն խախտելու դեպքում կրել համապատասխան պատիժներ. «Ամենայն բնակիչը աշխարհին մերոյ կամաւ ընդունելութեամբ յանձն առնուն վարձ գործոց ձեռաց իւրոց թէ կեանս պատուականս և թէ մահ նախատանօք փոխանակ գործոյ անօրէնութեան իւրեանց ոչ ՚ի յառնէ ՚ի հրամանաւ ինքնակամ իշխանէ և ո՛չ ՚ի սպանութեան օղէ՝ եթէ ո՛չ միայնակ ՚ի ձեռանէ իւրմէ հատեալ վճռէ Օրինաց իւրոց»¹⁷։ Այս ձևով պատժի կիրառումը կգոհացնի նույնիսկ պատժվողին, «քանզի վճիռն գործոյն իւրոյ ինքն ըստ կամաց և ըստ հաճոյից իւրոց է՝ հատ և ինքն ըստ անձին աղատապէս թաղաւոր գողով՝ կարգադրեաց օրէնս... և ինքն իւրն հնազանդ օրինաց իւրոյ արար պարտաւոր և մնայ ընդունիլ հատուցումն գործոց իւրոց թէ պատիւ և թէ պատիժ ըստ օրինաց իւրոց»¹⁸։

Անցնելով պատժի նպատակի հարցին, պետք է նկատել, որ այն Շահամիրյանի մոտ ձեռք է բերում բաղմակի իմաստ։ Նախ՝ «Որոգայթում» պատժի կիրառումը հետապնդում է ընդհանուր նախազգուշական նպատակ. պատժելով հանցագործին, այդ երևույթը միաժամանակ ներգործում է հասարակության մնացած անդամների վրա՝ ետ պահելով նրանց հանցավոր ոտնձգություններից. «...և կալանաւորութիւնս (հանցագործի—ձ. խ.) լինիցի դարման նշաւակութեան ապաղայ տկարացելոց մերոց (հայ ժողովրդին)»¹⁹։ Իսկ ներգործության ուժը, ինչպես տեսանք, Շահամիրյանը վերագրում էր ոչ թե պատժի խտրությանը (չնայած նրա մոտ պատիժներն այնքան էլ մեղմ չեն), այլ նրա անխուսափելիութեանը։ Պատիժը, ընդհանուրից բացի, ունի նաև հատուկ կամ մասնավոր նախազգուշական նպատակ՝ հնարավորություն չտալ պատժվողին նոր հանցագործություն կատարելու. «...որ ի որ որ պատճառէ որ իցէ՛, եթէ կամիցին ուխտադանց լինելով գործել զշարիս իսկոյն ըմբռնեցի անձն ամենայն ըղգայարանօք նորա պահելով անշարժ, զի ձեռն չարագործին մի՛ գտցի շարժում գործելոյ շարութիւն մինչև հատուցանելով վարձ գործոց շարութեան իւրոյ»²⁰։ Ինչպես երևում է այս վերջին պարբերությունից, պատժի կիրառումը ենթադրում է նաև կատարած հանցագործության հատուցում։ Հատուցման տեսությունը գալիս է վաղ ժամանակներից և սլաշտպանվել է նաև բազմաթիվ բուրժուական մտածողների կողմից։ Այսպես, Կանտը «ակն ընդ ական, ատամն ընդ ատաման» թալիոնի սկզբունքի կիրառումը դիտում էր կատարած հանցագործության համար արժանի հատուցում²¹։ Չնայած Շահամիրյանը ընդունում էր «ամենայն բնութիւն մարդոյ բնականապէս խոստովանի ակն ընդ ական և ատամն ընդ ատաման արդարութիւն»²² սկզբունքը, ուսկայն միայն երեք դեպքերում է դեկավարվել դրանով (հարբած վիճակում սպանություն և մարմնական վնասվածք հասցնելու համար նախատեսվում են հարբեցնելու միջոցով պատիժներ. հոդվածներ 471, 472)։ Ինչպես Կանտը²³, այնպես էլ Շահամիրյանը հիշյալ սկզբունքով ձգտել են հավասարություն ստեղծել կատարած հանցագործության և դրա համար կիրառվող պատժի միջև։

Պատիժը պետք է նշանակվի ոչ միայն այն հաշվով, որպեսզի հանցագործը հատուցի իր հանցանքի համար, այլև միաժամանակ հնարավորություն

17 «Որոգայթ փառաց», էջ 76։

18 Նույն տեղում, էջ 21։ Այս մասին տե՛ս նաև էջ 9։

19 Նույն տեղում, էջ 9։

20 Նույն տեղում։

21 Курс Советского уголовного права. Т. 3, М., 1970, с. 32.

22 «Որոգայթ փառաց», էջ 72։

23 А. И. Понятковский. Уголовно-правовые воззрения Канта, А. Фейербеха и Фихте.—Ученые труды Вессоюзного института юридических наук НКЮ СССР. Вып. 1. М., 1940, с. 63.

ունենա վերադաստիարակվելու և ուղղվելու. «Բժշկեսցի 'ի տկարութենէ շարեաց իւրոց»²⁴: Սա արդեն պատժի դաստիարակչական կողմն է, որը պատժի նպատակներն մեջ ամենաարժեքավորն է: Դաստիարակման նպատակը «Որոգայթում» հիմնականում իրականացվելու էր հանցագործության կատարման դրդապատճառին համապատասխան պատժատեսակ նշանակելու միջոցով: Այս երևույթն ակնառու կերպով դրսևորվել է 192-րդ հոգվածում: Երբ մեկը հարվածել է մեկ ուրիշին, ապա դատարանը պատժատեսակ ընտրելիս պետք է դեկավարվի հետևյալ կերպ. ա) եթե ամբաստանյալը ջղային է և ուժեղ, պետք է բանտարկել այնքան ժամանակ, մինչ մեղմանա և դառնա խոնարհ. բ) եթե հարուստ է, պետք է հատուցի իր «անիրաւ» հարստության չափին համապատասխան տոկոսներ, «զի իջցէ հպարտութենէ». գ) եթե իշխանազուն է և փառասեր, պետք է «հարկանելով զան հայրցի նմայ հուշակաւոր տեղի». դ) իսկ եթե նույն արարք կասարողը աղքատ է և այն կատարել է «ի բնական եռացմանէ արենէ», պետք է տուժողը հարվածի նրան այնպես, ինչպես ինքն է հարվածել: Այս վերջին դեպքում բացառապես դաստիարակելու նպատակով Շահամիրյանը դեկավարվել է «ական ընդ ական, ատամն ընդ ատաման» սկզբունքով:

Պատժի կիրառման արդարությունը ապահովելու նպատակով համարյա անընդմեջ պաշտպանում էր կատարված հանցագործության ծանրության և կիրառվող պատժի խստության համամասնության սկզբունքը. «...բառցցի և կորընչեսցի ամենայն շարագործ ըստ արժանի գործոյն ձեռաց իւրոց»²⁵: Հայաստանի գլխավոր դատավորին տված լիազորագրում, մասնավորապես լիազորվողից պահանջվում էր «արդարութեամբ հատանեսցես վճիռ 'ի վերայ գործոց ձեռաց և բանից, ըստ իւրաքանչիւր գործոց ըստ Օրինօքն Հայաստանեաց»²⁶:

Կատարված հանցագործության և կիրառվող պատժի միջև համամասնությունը ապահովելու նպատակով Շահամիրյանը նախատեսել էր որոշակի պատժասխտեմ, որի մեջ ամենածանրը մահապատիժն էր: Վերջինս պատժասխտեմի մեջ ընդգրկելու հարցը քննարկվող ժամանակաշրջանում ձեռք էր բերել խնդրի նշանակություն. մտածողների մի մասը (Դիդրո, Վոլտեր, Բեկկարիա), բացառությամբ առանձին աննշան դեպքերի, դեմ էր մահապատիժին, իսկ մյուս մասը (Ռուսո, Կանտ և այլք)՝ կողմ էր: Շահամիրյանը վերջին տեսակետի կողմնակից էր և նրա մոտ այն պայմանավորված էր ընդհանուր նախազգուշացման անհրաժեշտությամբ. «Մահ մեղաւորին [լինիցի] վասն նշաւակի կենդանեաց, զի զսպեսցեն կենդանիքն վարքս իւրեանց 'ի շարագործութենէ»²⁷: Եթե Բեկկարիան միապետության կողմնակից էր և մահապատժի կիրառմանը դեմ լինելով ցանկանում էր վերացնել այն վտանգը, որով առանձին անհատների ցանկությամբ մարդիկ զրկվում էին կյանքից, այդ թվում նաև՝ բազմաթիվ անմեղներ, ապա «Որոգայթում» մահապատժի կիրառումը նախատեսվում էր հանրապետական կարգերում, որտեղ այն իրականացվելու էր միայն օրենքի հիման վրա, օրենք, որը, ըստ Շահամիրյանի, արտահայտելու էր ժողովրդի կամքը, այդ թվում նաև՝ պատժվողի: Մահապատժի կիրառման կողմնակից լինելով հանդերձ, Շահամիրյանը այնուամենայնիվ այս հարցում ցուցաբերել է իր հումանիզմը: Նախ՝ բարոյական տեսակետից նա մահապատժի երևույթը դիտում էր նողկալի: 221-րդ հոգվածով մահապատիժ իրականացնողի աշխատանքը համարվում էր անպատիվ և նա իրավունք չունեւ հետագայում այլ աշխատանքի անցնելու: Եթե ընդհանուր առմամբ դատավորները, իբրև մարդ, արդարադատությունը իրականացնելիս պետք է առաջնորդվեն սառը բանականությամբ՝ «մի տեսանելով զերեսս մարդոյ ողորմեսցիս և խստանացուցանես սիրտ քո առ գանգատօղ և դատախաղս» (հոգված 59), ապա 225-րդ հոգվածի համաձայն, դատավորը մահապատիժ նախատեսող գոր-

24 «Որոգայթ փառաց», էջ 9:

25 Նույն տեղում, էջ 40:

26 Նույն տեղում, էջ 183—184:

27 Նույն տեղում, էջ 284 (հոգված 225):

ծերը քննելիս պարտավոր է գթություն ցուցաբերել: Բացի այդ, ժողովուրդը պարտավոր է սիրել այն փաստաբանին, որը օրենքի սահմաններում կկարողանա ադատել պաշտպանյալին մահվան դատալուծից (հոդված 226): Ավելին, մահապատժի դատապարտվածները, օրենքով սահմանված կարգով, կարող էին ներում ստանալ, մահվան վճիռը չէր կարող իրականացվել առանց հայոց տան (պառլամենտի) հավանության (հոդվածներ 223, 224) և այլն: Վերը նշված միջոցառումներով Շահամիրյանը ցանկացել է նվազագույնի հասցնել մահապատժի կիրառման հնարավորությունը և սխալ դատավճիռների իրականացումը:

Հաջորդ պատժատեսակներն են՝ ադատազրկումը (15 օրից մինչև ցմահ), տուգանքը, մարմնական պատիժները (ծեծ և շիկացած երկաթով ձեռքն աչրել), պաշտոնանկությունը և այլն: Ելնելով ընտանիքի անդամների շահերից, Շահամիրյանը չէր թույլատրում մահվան դատապարտվածի ինչքի վրա բռնադրում տարածել (հոդվածներ 220, 367): Բացի այդ, տուգանքներից դանձվող սղջ գումարը օգտագործվելու էր ընչազուրկների կարիքները բավարարելու համար: Շահամիրյանի կողմից մարմնական պատիժների ընդունումը շատ դժվարեցրեց ուղղված է եղել դաստիարակման նպատակին:

Ըստ «Որոգայթ փառացի» հանցագործության ենթակա, այսինքն հանցագործություն կատարող, կարող է լինել որոշակի տարիքի հասած, մեղսունակ անձը: Քրեական պատասխանատվությունը սկսվում է անձի 18 տարին լրանալու հետ, իսկ դրանից պակաս տարիք ունեցողների նկատմամբ թույլատրվում է կիրառել միայն դաստիարակչական բնույթի ներգործության միջոցներ. «Ամենայն պատիժ՝ ի վերայ քրեական մեղաւորաց կատարեսցի... թէ սեղաւորն: գույշէ [դոցի] տի հասակի իւրոյ ավելի քան թէ ութնետասն ամաց, եթէ սակաս, խրատելով արձակեսցի իբր մանուկ» (հոդված 200):

Չնայած Շահամիրյանն ուղղակի չի խոսում 18 տարին լրացած, բայց անմեղսունակության վիճակում գտնվող անձի կողմից կատարած հանցավոր արարքների պատժելիության հարցի մասին, սակայն նրա արած առանձին դատողություններից երևում է, որ նման դեպքերում ևս անձը չի կարող քրեական պատասխանատվության կանչվել: 494-րդ հոդվածի դիսպոզիցիան պահանջում է որոշ կարգի պաշտոնատար անձանց աղատել աշխատանքից, եթե որևէ մեկի կողմից հասցրած վիրավորանքի դեմաց նրանք չեն պաշտպանել իրենց պատիվը, քանզի «ոչ կարաց պահել պատիւ կարգ աստիճանի ազատութեան իւրոյ, բայց ՚ի խեղադար յառնէ»: Եթե նկատի ունենանք, որ «Որոգայթում» անձի պատիվը և արժանապատվությունը հիմնականում պաշտպանվում էին դատական կարգով, ապա դժվար չէ հետևել, որ եթե հոգեկան հիվանդի կողմից հասցրած վիրավորանքի նկատմամբ ցուցաբերած անտարբերության համար պաշտոնատար անձը չի ազատվում աշխատանքից, ուրեմն, Շահամիրյանը դրանով իսկ նշված հիվանդի արարքում բացառում է մեղքի դրսևորման փաստը: Նշված՝ կտրեղոր հարցի ուղղակի լուծման բացակայումը պետք է բացատրել նրանով, որ դեռ վաղ ժամանակներից հայ քրեական իրավունքում այն լուծվել²⁸ և լուծվում էր դրական առումով, ուստի և Շահամիրյանը ավելորդ է համարել դրա մասին առանձին դրել:

«Որոգայթ փառացում» հատկապես շեշտվում է, որ հանցագործության ենթակա կարող է լինել միմիայն դրա մեջ մեղավոր անձը. «Հատուցումն վասն պարտուց քրեական մեղաց ոչ այլ ոք հատուցէ բայց միայն անձն մեղաւորին որում գործ ձեռաց նորա գործեցաւ մեղս քրեականս» (հոդված 214): Դրանով իսկ բացառվում է անմեղ մարդկանց, մեղավորի հարազատներին քրեական պատասխանատվության ենթարկելու հնարավորությունը:

«Որոգայթ փառացում» նախատեսված են հանգամանքներ, որոնք վերացնում են արարքի հասարակական վտանգավորությունը: Որպես ալոպիսին, նախ, պետք է նշել անհրաժեշտ պաշտպանության սահմաններում կատարած

28 Ա. Թ. Թ ո վ մ ա ս յ ա ն. Հին և միջնադարյան հայ քրեական իրավունք. Երևան, 1962, էջ 265—268:

արարքները: 215-րդ հոդվածը տանտիրոջը իրավունք է վերապահում սպանել նրան, ով գիշեր ժամանակ զինված մտնում է նրա բնակարանը: Նման դեպքերում «արիւն նորա ի ձեռանէ սպանողի մի խնդրեսցի»²⁹: Այս և այլ օրինակներում, հասկանալի է, սպանողը չի պատժվում անհրաժեշտ պաշտպանության սահմանակարգի ուժով: Սակայն որպեսզի հիշյալ սահմանակարգի նպատակը չնարաջահվի, Շահամիրյանը նախատեսել է որոշակի պայմաններ և միայն այդ պայմանների առկայության դեպքում կարող է խոսք գնալ անհրաժեշտ պաշտպանության մասին: 215-րդ հոդվածի դիսպոզիցիայից երևում է, որ տվյալ դեպքում արարքը արտաքինապես պետք է բավարարի հետևյալ պահանջներին. ա) հարձակվողը պետք է զինված լինի սուսերով. բ) հարձակումը պետք է կատարվի գիշեր ժամանակ և այն էլ ժամը 21-ից հետո. գ) հարձակումը պետք է կապված լինի ուրիշի բնակարան մտնելու հետ. դ) այն կրելու է հանկարծակի բնույթ: Քանի որ գործնականում դժվար է տվյալ դեպքերում պարզել հարձակման նպատակը (սուսերով ցանկանում է սպանել, թե՛ մարմնական վնասվածք հասցնել), ուստի խնդրո առարկա չի դարձվում հարձակման նպատակը: Իսկ 461-րդ հոդվածը արդեն անհրաժեշտ պաշտպանության առկայության հարցը սերտորեն կապում է ոտնձգության նպատակի հետ, համաձայն որի, եթե մեկը հանդգնաբար մտնում է ուրիշի տուն կռվելու կամ վրեժ լուծելու մտադրությամբ, ապա տանտերն այս դեպքում կարող է «ազատապէս հարկանել և դուրս ձգել մինչ խոցել, այլ ոչ սպանել»: Անհրաժեշտ պաշտպանության նման սահմանափակումը պայմանավորված է ոտնձգության վտանգավորության մասով: Այս դեպքում արդեն հարձակվողը չպետք է զինված լինի և հարձակումն էլ չպետք է կատարված լինի գիշեր ժամանակ. հանդամանքներ, որոնք սակավ են դարձնում հանցագործության վտանգավորության աստիճանը:

Ամեն դեպքում, երբ մարդու կյանքին իրական վտանգ է սպառնում, նա կարող է որպես անհրաժեշտ պաշտպանություն ընտրել հանցագործին սպանելու միջոցը. «Աւագակ ոմն եթէ մէջ աւագակութեան իւրոյ գուցէ դոտի ջատադուութիւն և ի ձեռնէ ջատագովողէ մեռցի աւագակն, արին աւագակին մի՞ խնդրեսցի ՚ի ջատագովողէ» (հոդված 191): Ավագակությունը, ինչպես մեն օրերում, այնպես էլ XVIII դարում իրենից ներկայացնում էր մի այնպիսի հանցագործություն, որը իրական վտանգ է սպառնում հարձակման ենթարկվողի կյանքին, ուստի և դրանից պաշտպանվելու համար կատարված սպանությունը Շահամիրյանը դիտում է անհրաժեշտ պաշտպանություն³⁰:

Արարքի հասարակական վտանգավորությունը վերացնող մյուս հանգամանքն է ծայրահեղ անհրաժեշտությունը: Շահամիրյանը, խոսելով հայ ժողովրդի թույլ տված մեղքերի գնահատման հարցի մասին, մասնավորապես նշում է, որ «քաղցեալն կերաւ և յագեցաւ, մերկն զգեցաւ, գեղեցիկն սիրեցաւ և այլն, որ ամենայն բնութիւն մարդոյ ո՛չ ոք կարէ զսպել անձինս իւր ՚ի այսպիսի բնական մեղաց ո՛չ ուտող և ո՛չ զգենօղն և ամուսնացեալն կարի զրկիլ ՚ի բարութենէ Տէառն, և կուրուսանել պատիւս ազատութեան իւրոյ»³¹: Եթե նկատենք, որ հայ լուսավորականը մեր ժողովրդի թույլ տված այդօրինակ «մեղքերը» պատժելի չի համարել, նույնիսկ կրոնաաստվածաբանական իմաստով, ապա հասկանալի է, որ երբ մեկը իր առավել կենսական պահանջները (մերկությունը ծածկելու, քաղցը հագեցնելու և այլնի) բավարարելու համար կատարում է արտաքինապես հանցագործությանը նման որոշակի արարք, ուրեմն, առավել ևս, չի կարող պատժվել քրեական իմաստով: Այսպիսով, Շահամիրյանի մոտ այդ և համանման բնույթի արարքները փաստորեն գնահատ-

²⁹ «Որոգայթ փառաց», էջ 250 (հոդված 115):

³⁰ Անհրաժեշտ պաշտպանության մասին տե՛ս նաև հոդված 363:

³¹ «Որոգայթ փառաց», էջ 99:

վում են որպես ծայրահեղ անհրաժեշտություն³²։ Ինչպես տեսնում ենք, աշատեղ ընդարձակում է միայն մարդու առավել կենսական պահանջների բավարարման անհրաժեշտությունը, սակայն «Որոգայթի» 389-րդ հոդվածը ցույց է տալիս, որ Շահամիրյանի մոտ ծայրահեղ անհրաժեշտության սահմանակարգի ծավալը դրանով չի սպառվում։ Նշված հոդվածով, հույկական ղորքը պատերազմի ժամանակ իրավունք չունի քանդելու թշնամու քաղաքացիական նշանակության շինությունները, «բայց յայնմանէ որ հարկաւոր լինիցի դաշտեցոյցանել շուրջ ամրոցի բերթօրէից առ ՚ի ապահովութեանց, և որ ոք ամրոց թշնամեաց պատերազմաւ ստացեալ, եթէ հարկաւոր լինիցի մեղ աւերել և քակել վասն աջողութեան պատերազմի մերոյ պարիսպն և բուրջն ամրոցաց և բերթօրէից և տուն վառչօղի և ջաբախանայի, և բնակութիւն դինուորաց միայն աւերեսցի»։ Այս օրինակում արդեն Շահամիրյանը, մի կողմից թույլ է տալիս ավելի մեծ արժեքներ ձեռք բերելու համար (պատերազմը շահել, հինվորների անվտանգությունը ապահովել) ոչնչելու և առավել նվազ կարևորության արժեքները (ռազմական և ուրոշ տարածքում գտնվող քաղաքացիական բնույթի շինություններ), մյուս կողմից՝ արգելում որոշակի անհրաժեշտությունից ելնելով (բայց ոչ ծայրահեղ) վնաս հասցընել նույնիսկ թշնամու նյութական արժեքներին։ Սա ևս Շահամիրյանի հումանիզմի դրսևորումներից մեկն է։

Շահամիրյանը բավական հետաքրքիր ձևով է լուծել ապաստանի իրավունքի հարցը։ Հիշյալ իրավունքից օգտվում են ոչ միայն օտարերկրացիները, այլև հանրապետության քաղաքացիները՝ իրենց իսկ հայրենիքում։ Այս վերջին դեպքում ապաստանի իրավունքը սերտորեն կապված է բնակարանի անձնամխելիության հետ։ 185-րդ հոդվածով պաշտոնատար անձինք կամ սրտնցներկայացուցիչները, թեկուզև հանցագործին բռնելու նպատակով, եթե բնակարանի դուռը բաց չէ, իրավունք չունեն այն ջարդելու միջոցով ներս մտնել։ Իսկ 327-րդ հոդվածով՝ «ամենայն փախստական ՚ի ամենայն ազգէ որ լինիցի եթէ մտցի աշխարհն մեր գտցի պահպանութիւն ՚ի մէնջ ըստ Օրինօք մերոյ»։ Երբ Հայաստանում ապաստան գտած օտարերկրացին իր հայրենիքում քաղաքացիական բնույթի պարտավորություններ ունի, նա ամեն դեպքում դրանք պետք է կատարի³³։ Եթե ապաստան գտածը կատարել է այնպիսի հանցագործություն, որը կապված է եղել նյութական արժեքների հափշտակման հետ, նա պարտավոր է հափշտակած գույքը «ըստ Օրինօք մերոց յետս դարձուցանի Տեսառն իւրոյ, անձն իւր միայն փրկեսցի ՚ի պատժոյ դատաստանի և զինքն մնալ նախատանօք» (հոդված 327)։ Շահամիրյանը, օտարերկրյա հանցագործին բրեական պատասխանատվությունից ազատելով, նրան չի ազատում բարոյական պատասխանատվությունից՝ նախատինքից։

32 Կազմակերպվելիք Հայկական հանրապետությունում ընդադուրկների համար Շահամիրյանը նախատեսել էր մի շարք միջոցառումներ, որոնցից հիշարժան են՝ ա) պետության հաշվին աղքատանոցների բացումը (հոդվածներ 161, 177), բ) անվճար բժշկական օգնությունը (հոդված 262), գ) անտառներից անվճար սննդի միջոցների հավաքումը (հոդված 266) և այլն։

33 Այս դեպքերում քաղաքացիական պարտավորությունները կատարելիս պետք է ղեկավարվեն հայկական օրենքներով, որն ապաստան գտածի համար ստեղծում էր ավելի նպաստավոր պայմաններ։

Ամփոփելով մեր համառոտ հաղորդումը, կարող ենք ասել, որ Շահամիր Շահամիրյանը «Որոգայթ փառացով» հալ քրեաիրավական միտքը բարձրացրեց մի նոր աստիճանի: Եթե այդ աստիճանը միանգամայն բնական էր դիտվում եվրոպական բուրժուական մտածողների կողմից քրեական իրավունքի բնագավառում առաջ քաշած նոր սկզբունքների շարքում, Հայաստանի համար Շահամիրյանի գաղափարներից շատերը նորություն էին: Նա հանցագործության փաստը սերտորեն կապեց համապատասխան օրենքների գոյության և արարքի վտանգավորության հետ: Պատժի մեջ Շահամիրյանը տեսավ ոչ միայն կատարված հանցագործության հատուցման, ընդհանուր և հատուկ նախազգուշացման, այլև հանցագործի դաստիարակման և ուղղման նպատակ: Նա մշակեց որոշակի պատժասիստեմ, որը պետք է ապահովեր պատժի նպատակի իրագործումը: «Որոգայթ փառացով» քրեական իրավունքի դրույթները ներծծված են հումանիզմի գաղափարներով: Նույնիսկ սարմնական պատիժների գոյության փաստը (որքան էլ տարօրինակ թվա) ոչնչով չի կարող հապաքել ասվածին: Եթե Արեւելքում, այդ թվում և Հայաստանում, մարմնական պատիժները համատարած բնույթ էին կրում, ապա «Որոգայթում» այն խիստ սահմանափակված է: Մարմնական պատիժների նախատեսումը մեծ մասամբ կապված է դաստիարակչական նպատակի իրականացման հետ և հիմնականում ծառայում է առանձին տեսակի հանցագործությունների դեմ պայքարելուն: Շահամիրյանն այդ տեսակետից ժամանակի մտածողների շարքում միայնակ չէր: Նա այնքան էր տարված հումանիզմի գաղափարներով, որ չէր տեսնում, թե իր իսկ կողմից սահմանված ապաստանի իրավունքի միջոցով որքան էր դժվարանում ծանր հանցագործությունների դեմ պայքարելը: Պատժի անհատականացման, օրենքի առաջ բոլորի հավասարության և նրա պահանջի տնխատելիության ու հետադարձ ուժ չունենալու սկզբունքները, ինչ խոսք, առաջադիմական բնույթ ունեին:

ВОПРОСЫ УГОЛОВНОГО ПРАВА В «ЗАПАДНЕ ЧЕСТОЛЮБИЯ»

Г. С. ХАЧАТРЯН

(Резюме)

Армянский мыслитель XVIII в. Шаамир Шаамирян дал наиболее целостное освещение вопросов уголовного права с позиций просветительства. В его трактате «Западная честолюбия» получили проявление такие прогрессивные принципы и требования, как: «нет преступления, нет наказания без закона», индивидуализация наказания и др., которые, по Шаамиряну, должны были быть положены в основу осуществления уголовного правосудия в будущей армянской республике.